

Camping-Lied Text und Musik Karl Berbuer

(Orthographie angepasst)¹

Flöck dä Rucksack engepack,
es dat neue Zelt em Sack?
Mamm, mer wolle all jet en Erholung gonn.
Kochgescherr, wat söns noch all,
uns Kanaljemöschtigall², nemm se met,
dä Kammerpott loss stonn.
Un et rähnte wie e Bies,
doch em Sölztal op 'ner Wies
loge Schmitzens jetz em Zelt bei Mutter Grön.
Weil die eeschte Naach ald doll
un de Mamm de Nas ald voll,
säht der Papp, dä't god gemeint hät:
Häs do Tön:

Refrain:

Do laachs do dich kapodd,
dat nennt mer Camping,
do laachs do dich kapodd,
dat fingk mer schön,
wenn em Zelt de Mücke
un de Hummele dich verjöcke,
un do kanns dann nit eraus em Rähn.
Wenn em Zelt de Mücke
un de Hummele dich verjöcke,
un do kanns dann nit eraus em Rähn.

Hasche mich en Höppekrad,
höpften op dem Schmitz sing Plaat,
Mamm, do häs 'ne Käfer em „Encoeur de bläck“³.
Die Invasion em Zelt,
nit erwünsch un aangemeldet,
wor zwor fies, doch wor de Langwiel weg.
Un et rähnte wie e Bies,
doch de Mamm un och et Nies
hatte Jöck un wollten en der Bach eren.
„Mutti,säht et Nies, „pass auf,
tritt nit en dä Ameishauf!“
Schrumm, do soß sei ald met ehrem Bretzel dren.

Do laachs do dich kapodd...

Weil dä Schäng die Diercher satt,
schlog hä sei mem Knöppel platt,
dat hät nix genotz, et kome immer mih;
denn wann ein dobei krepeet,
han er fuffzig kondoleet,
un zom Schlofe kome Schmitzens nie

Un et rähnte wie e Bies
en de Zupp un op der Kis
un de Wespen han sich em Kompott gezänk.
Plötzlich bei 'nem Sturm, o Godd,
reef de Mamm: Et Zelt flüg fott,
och wie herrlich uns Erholung es am Engk.

Do laachs do dich kapodd...

© 1955 Melodie der Welt-J.Michel GmbH & Co. KG

1 nach den Richtlinien der Rechtschreibung der Akademie für uns kölsche Sproch 2007
2 scherzh. für Kanarienvogel, wörtlich: Kanariennachtigall
3 scherzh. für Dekolletee